

DULCE M<sup>a</sup> GARCÍA MELLA, SECRETARIA XERAL DA UNIVERSIDADE DE SANTIAGO DE COMPOSTELA,

CERTIFICA, antes da aprobación da acta correspondente, que o Consello de Goberno na sesión ordinaria celebrada o 4 de decembro de 2020 aprobou unha modificación do *Regulamento de concesión dos premios extraordinario de grao e máster da USC*, quedando o texto consolidado nos termos do documento adxunto.

E para que así conste, asino a presente certificación en Santiago de Compostela, co V<sup>o</sup> e Prace do sr. reitor.

V<sup>o</sup> e prace

O reitor

Antonio López Díaz

Documento asinado dixitalmente conforme a Lei 39/2015 de 1 de outubro, do procedemento administrativo común das administracións públicas (BOE nº 236 do 2 de outubro de 2015).

## Texto consolidado

Aprobado por acordo do Consello de Goberno na súa sesión do 20 de decembro de 2019  
Modificado por acordo do Consello de Goberno na súa sesión do 29 de decembro de 2020.

## REGULAMENTO DE CONCESIÓN DOS PREMIOS EXTRAORDINARIOS DE GRAO E MASTER DA UNIVERSIDADE DE SANTIAGO DE COMPOSTELA

### Exposición de motivos

O Consello de Goberno do 27 de abril de 2012 aprobou o procedemento de concesión dos premios extraordinarios de grao e máster da USC. Dadas as dúbidas xurdidas sobre a aplicación do procedemento foi necesario ditar a Instrución 15/2012 da Secretaría Xeral sobre procedemento de concesión do premio extraordinario de grao e máster. Posteriormente, modificouse o procedemento por acordo do Consello de Goberno do 26 de marzo de 2014 e do 22 de febreiro de 2018.

Ademais, para a concesión dos premios extraordinarios de grao e máster é necesario dispor dos ránkings do curso académico que corresponda. Debido a cuestións de calidade dos datos, e para asegurar a certeza dos mesmos, ditos ránkings non poden considerarse definitivos ata finais de novembro. Isto implica que os prazos de remisión das propostas dos centros indicadas nas normativas citadas non teñan operatividade, polo que anualmente é necesario ditar unha resolución de ampliación de prazos neste sentido.

Por outra parte, faise necesario incluír nesta norma algunha casuística non contemplada con anterioridade e mellorar o procedemento dando máis seguridade xurídica.

É preciso, pois, aprobar unha nova regulación de concesión dos premios extraordinarios de grao e mestrado da USC, que unifique e actualice as dúas normas existentes.

Por todo o anterior, o Consello de Goberno do 20 de decembro de 2019 acordou aprobar a normativa de concesión do premio extraordinario de grao e mestrado da USC co seguinte teor:

### Artigo 1. Obxecto e ámbito de aplicación

Este regulamento ten por obxecto establecer o procedemento de concesión dos premios extraordinarios das titulacións de grao e mestrado oficiais impartidas nas Facultades e Escolas de titularidade da Universidade de Santiago de Compostela.

### Artigo 2. Número de premios

O Consello de Goberno da Universidade de Santiago de Compostela poderá outorgar como máximo dous premios extraordinarios por cada grao oficial e un por cada mestrado universitario oficial, con independencia de que a titulación se imparta en un ou varios centros ou campus.

A proposta de concesión do premio extraordinario será realizada polo Centro de adscrición da titulación.

O Centro poderá deixar desertos algúns dos premios, e en ningún caso se poderá acumular o número de premios que queden vacantes para futuros cursos académicos.

### **Artigo 3. Destinatarios**

Só poderán ser obxecto de valoración aqueles estudantes que acadaran o grao ou mestrado universitario oficial no precedente curso académico a aquel no que se concede o premio extraordinario. O alumnado que cursara un programa de dobre titulación de grao poderá optar ao premio extraordinario de cada un dos graos que o conforman.

O alumnado que acade a titulación e que teña accedido dende os cursos ponte ou por recoñecemento, adaptación ou validación de estudos, non poderá ser proposto para o premio se supera en máis dun terzo as materias de dita titulación por cursos ponte, ou por recoñecemento, adaptación ou validacións de estudos. Para o alumnado que cursara un programa de dobre grao non computarán a estes efectos os recoñecementos internos entre os dous plans.

Ademais para ser destinatarios dos premios extraordinarios de grao será necesario:

a. No caso de estudantes que realizaron os estudos a tempo completo, telos finalizado no número de cursos académicos establecido na titulación ou, de ser o caso, no programa de dobre titulación.

b. No caso de estudantes que realizaron estudos a tempo parcial, telos finalizado nun prazo máximo de dous cursos académicos a maiores do número de cursos establecidos para a titulación ou, de ser o caso, para o programa de dobre titulación.

Para ser destinatarios dos premios extraordinarios de mestrado universitario oficial será necesario ademais:

a. No caso de estudantes que realizaron os estudos a tempo completo, telos finalizado no número de cursos académicos establecido na titulación.

b. No caso de estudantes que realizaron estudos a tempo parcial, telos finalizado nun prazo máximo do dobre do número de cursos académicos establecido para a titulación.

### **Artigo 4. Proposta de concesión**

Por resolución da Secretaría Xeral abrirase cada curso académico o procedemento para que os centros podan realizar as propostas de concesión dos premios extraordinarios de grao e máster, unha vez sexan definitivas as clasificacións ordenadas das promocións.

O premio recaerá en estudantes que acadaran a máxima ou máximas cualificacións da súa promoción.

O decanato ou dirección do Centro, ben directamente ou ben por encargo da comisión que teña delegada esta competencia, remitirá a proposta definitiva á Secretaría Xeral no prazo que se indique na resolución de apertura do procedemento de concesión dos premios extraordinarios de grao e máster.

Na valoración dos estudos incluíranse todas as materias superadas, tamén o traballo de fin de grao (TFG) e o traballo fin de mestrado (TFM).

Os centros deberán enviar as propostas definitivas dos premios de todas as titulacións adscritas ao mesmo, tanto de grao como de mestrado universitario oficial. A proposta definitiva non poderá exceder do número máximo de premios que se indica no artigo 2, podendo ser inferior a ese tope.

No caso das titulacións impartidas en varios centros ou campus, as propostas definitivas serán enviadas unicamente dende o Centro ao que estea adscrita a titulación.

O premio ou premios deben declararse desertos se os/as estudantes que obteñan os primeiros postos da promoción non acadan unha puntuación media de 8. No entanto, o órgano proponente poderá realizar propostas cunha puntuación inferior sempre que se motiven axeitadamente.

O Centro emitirá en primeiro termo unha proposta provisoria, que fará pública no Taboleiro Oficial de Anuncios da USC, e contra esta poderán presentarse alegacións no prazo de 10 días dende a súa publicación.

Finalizado o prazo de presentación de alegacións e unha vez valoradas polo Centro, este emitirá a proposta definitiva de concesión, que remitirá á Secretaría Xeral para a súa tramitación ante o Consello de Goberno, xunto cun informe sobre as alegacións recibidas, a valoración destas e a súa incidencia respecto á proposta provisoria. Contra a proposta definitiva de concesión non caberá recurso.

#### **Artigo 5. Concesión dos premios extraordinarios**

O Consello de Goberno é o órgano competente para adoptar a decisión sobre a concesión dos premios extraordinarios, en función das propostas presentadas.

O Servizo de Xestión Académica será o encargado de notificar ao interesado a concesión definitiva e incorporalo no seu expediente.

#### **Artigo 6. Recursos**

Contra a resolución de concesión dos premios extraordinarios os interesados poderán presentar recurso de reposición perante o Consello de Goberno.

#### **Artigo 7. Efectos**

Aos/ás estudantes aos que se lles outorgue o premio extraordinario expediráselles unha certificación conforme ao modelo que estableza a Secretaría Xeral. A primeira certificación non devindicará prezos públicos.

A referida mención incluírase tamén no Suplemento Europeo ao Título (SET) e nas certificacións académicas que se expidan. As expedicións dun novo SET e de novas certificacións académicas devindicarán as taxas que correspondan segundo a normativa aplicable.

O alumnado con premio extraordinario poderá ter outros beneficios e prioridades que lle outorgue a lexislación vixente ou convocatorias específicas respecto a esta distinción.

#### **Disposición adicional**

No momento de entrada en vigor desta norma o sistema de valoración dos expedientes é o ránking da promoción, calculada conforme ao Protocolo de colaboración suscrito entre a Consellería e as universidades de Santiago de Compostela, A Coruña e Vigo para a valoración dos

expedientes académicos (DOG 30 de setembro de 2011) e aos acordos da comisión de seguimento deste, ou norma que a substitúa.

#### **Disposición transitoria**

Para a concesión dos premios extraordinarios de grao e mestrado universitario oficial iniciados con anterioridade á entrada en vigor deste regulamento aplicarase o procedemento establecido anteriormente.

#### **Disposición derogatoria**

Quedan derogadas todas as normas de igual ou inferior rango que se opoñan a este regulamento e, expresamente, a Normativa de concesión dos premios extraordinarios de grao e máster da USC, aprobado polo Consello de Goberno do 27 de abril de 2012 e as súas modificacións do 26 de marzo de 2014 e do 22 de febreiro de 2018, así como a Instrución 15/2012 da Secretaría Xeral sobre procedemento de concesión do premio extraordinario de grao e máster.

#### **Disposición final**

Este regulamento entrará en vigor o día da súa publicación no Taboleiro Oficial de Anuncios da USC, e será de aplicación a partir dos premios correspondentes ao curso 2019/2020.

## Sinaturas dixitais / Firmas digitales / Digital signatures

**Asinante/Firmante/Signer:** ANTONIO LOPEZ DIAZ, REITOR, UNIVERSIDAD DE SANTIAGO DE COMPOSTELA, 30/12/2020 12:23:44.

**Asinante/Firmante/Signer:** DULCE MARIA GARCIA MELLA, SECRETARIA XERAL, UNIVERSIDAD DE SANTIAGO DE COMPOSTELA, 30/12/2020 12:04:36.

**CSV:** 1BA0-B1B6-4F2B-821C